

武林往哲遺著

參寥集卷之七

宋智果禪師道潛參寥著

寄王元均奉議昆仲

崇文學士後二子皆翹翹異哉荆山麓產此英瓊瑶婆
娑翰墨場文彩相蔚饒頃我未知識寸心徒搖搖前年
廣陵城會合如有招名都冠淮海氣象古所豪林園苦
棊置佳處遺塵囂良辰肯浪負杖策同嬉遨清譚落玉
塵亶亶如聞韶歲晏樂未闕離羣復蕭蕭扁舟眇一葉
出沒隨江潮雲山列千里廬霍尤峩嵒孤懷喜自放跨
蹀豈憚勞所嗟無二陸相我吟風騷

廬山雜興四首

溪石斑斑舞碎光巖花冉冉馥幽香當時吳猛逢山處
金闕橫開在上方

隔崖垂蔓蔚蒼蒼隱見莓苔舊石牀定有飛仙集其下
月明時復度笙簧

高松夾道夕陽明抱葉風蟬引細聲勸爾行人聊駐足
出山無物更能清

星渚江邊月已生石橋歸路夜崢嶸西風散入松千樹
翻覆銀河秋浪聲

宿回峰院寄黃擇中察院

秋堂立四壁物色夜蕭然藜床抱孤影起坐未成眠商
飈激高梧萬動接虛警感至情先謝理冥神預領銅壺

漏未央扶杖起彷徨方塘溢繁荇冷月下疎篁躑躅步
空除風帶裊霜裾泯余契幽獨悵子隔川途短短袖中
書明發欲誰寄梁上木鯉魚儻能將此意古亦有所思
吾今何所遣浩歌望雲水期子與同歸

寄史院王正仲曾子開二學士

太史久不作千秋想前人朝廷理故事董職須絕倫青
錢兩學士班馬相並隣婆娑金閨中婉變得所親學海
揚波瀾詞林藹芳春青編炳金牘允顯無曲陳翹翹茂
令德諤諤規縉紳玉堂行兄躋清切凌紫宸野人蹈江
海放浪無邊垠相思邈何許共此青桂輪

寄福州太守孫莘老龍圖

公子自淮海弱不游羣兒良哉白玉質炯炯無磷淄澡
身以道德餘業爲文詞端能處庠序邈有孔孟姿一朝
擅高名卓然動京師餘輝耀天末熒熒如斗箕校酬芸
閣中精義無參差同時鵷鷺行半已翔鳳池兩登諫官
室抗疏犯天威揚舲去江海曠歲成流離朱輪擁茗霅
五馬從合肥編氓仰遺愛墮淚存豐碑歸來遘風樹憔悴
不展眉藉苦一室中四壁無重幃南鄰有古剎而我
方棲遲杖藜時過公泣血聞嗟咨從容勸我坐一飯常
共爲蒸蒸沸古鼎蔌蔌投園葵客來慵應門客去知爲
誰禮喪事云旣始領吳門麾瓶盂走梁苑恨不相追隨
秋風亟東下旌旆俄已睽浮川與遵陸多病亦云波七

閩富名山空翠相逶迤在昔慕仁智於今慰遨嬉棠陰
想初坐吏案紛交馳庖刀一爲解往往無子遺麥秋薦
丹實梅雨裁纖絺黃金燕佳客柔指鳴哀絲萬事不芥
蒂羨公能自怡

聞子由舟及南昌因寄之

高安居士實人龍五載南遷道愈豐域外城池剛自守
人間膏火詎能攻屢嗟江海星霜隔行喜雲林笑語同
五老峰前佳氣象待君一醉吐長虹

和子由彭蠡湖遇風雪

夫子經濟才妙質靜而默當年大廷中如堵觀射策雄
哉贇父兄一日並輝赫勳業望夔龍甯論二千石扶搖

客不借困此垂天翼五載敗筠陽區區校尋尺鹽車厄
驥足道路行歎惜脫身當歲晏行李唯典籍高懷久達
觀不見憔悴色悠悠東下船晚次彭蠡側江風忽崩騰
江水翻且黑飄風斷黃蘆落雁委砂磧鷺毛飛雪片滿
埜來無極龍驤飛萬斛欲進不可得淹留向汀灣蕭瑟
日將夕黃昏勢漸壯夜半已堆積魚龍亦悲嘯凜氣增
几席青燈冷不眠坐漱元和液危檣翻曉鴉霽日動窗
隙攀幃望廬山萬仞絕寸碧茫茫銀世界蕩蕩月闌域
順流復前趨百里俄頃刻暫停篙櫓喧却着登山屐五
老笑相迎千巖委圭壁紛紛林下士洗眼冀一識松門
共邀迂香霧浮翳翳相將擁寒爐軟語同夙昔堂堂赤

眼師旣往有遺跡惇然宰堵波縹緲根石壁清晨陪拄
杖緩步躡山肋裴回憇蒼嶺左右抗松樾猿猱侮僮僕
上下或戲劇巴僧眉半雪邂逅語鄉國却返朱砂峰招
提更岑寂中藏李氏書盛事誇絕特東坡老居士邇亦
有題墨一覽慰君心都忘遠行役

寄俞秀老清老二居士三首

風溪雲巘雪消初鳥變春聲滿屋除安得故人同蠟屐
石梁斜日看遊魚

落星江水接天流花絮飛時暮雨收波底鯉魚東去否
尺書煩汝到揚州

慚愧君家好弟兄風流宜與晉人并青鞋布襪能從我

共入廬山深處行

廬山道中懷子瞻

谷口晴雲散曉光
鳥聲呼我渡橫塘
輕明獨愛桃花靜
撩亂偏嫌柳絮狂
處處叢祠起簫鼓
家家籬落動耕桑
去年今日東坡路
拄杖相將探海棠

酬周亨叔主簿見贈

廬山百里蟠穹蒼
絕頂陰雲常下覆
晴日天風忽掃除
翠壁千層開錦繡
我來廬山初得君
愛君面有廬山秀
長篇嶮韻使我驚
忽獲風流雲散後
氣味清新滿牙頰
如入洞庭嘗橘柚
梅子如錢柳絮飛
杜鵑哀號山雨晝
念君明當京邑行
馬蹏蹏踏春泥
縐黃陂新息道路迢

墊飯藜羹須強喫天街到日夏漸熱車轂相摩汗如溜
丈夫功名非苟取勸子未用輕藍綬山中五月早歸來
澗底清冷當共漱

訪荆國王公三首

蕭蕩經綸志已行北山歸老思冥冥可妨渡水穿雲客
拄杖芒屨到戶庭

博辯舊聞輕孟子談經早不愧楊雄惠能伎倆元無有
還許從容廣座中

苦嫌榮祿早收身歸與漁樵共隱淪白下門西山迤邐
興來長是岸烏巾

謁上竺觀音大士

十年江海去飄然魂夢長依鷺嶺邊月地雲堦重到處
殷勤稽首白衣仙

次韻元翁見寄

十載離羣歎渺茫良辰無地可相羊何時却入蓮花社
軟語重焚柏子香藹藹春風搖几席紛紛啼鳥滿林塘
欲憑海燕傳消息徑入君家舊屋梁

病中四絕句呈劉景文左藏

一室寥寥北嶺隈午窗孤枕夢初回無端自是風驚竹
錯認旁人問疾來

西風薄木晚颼颼古屋無人夜更幽童子未閑煎藥火
隔窗燈影漫悠悠

高梧挂月照床頭
砧寒蛩似怨秋
我病尙能安靜默
爾曹無事苦啁啾

竹裏鳴鴉曉欲飛
遽褰疎箔望朝暉
莫嫌山色經秋瘦
我亦秋來減帶圍

次韻蘇仲豫承務寄伯達推官

蘇子真豪英
氣貌嚴且重
幼無兒女姿
嗜好百不動
唯餘讀書事
乃與古人共
文章造深淳
詞力寬不縱
樂哉賢父兄
道義日相從
昨朝西湖外
目極孤鴻送
高帆去百里
山水乏吟弄
作詩投置郵
但述鴿原夢

辯才生日

像未真
風恐不傳
故生豪傑爲人
天慈航橫截三千界

法雨均沾四十年獨鶴精神秋始健長松根節老彌堅
莫將有物觀無象唾霧冰輪處處圓

寄題解頤堂

道人還家今幾時築室構堂名解頤天書三遣要我賦
我獨老矣何能爲塵埃筆硯試料理肝肺枯槁源不滋
爲君苦思強抽軋詞慳氣迫無逶迤東陽自古號多士
文采風流世有之堂成往往獻佳句羅列四壁皆瑰奇
譬如鈞天已九奏安用擊筑鳴參差又如玉食厭方丈
葵藿欲進旁必嗤他年但約訪君去借君几席聊偃歔
堂中插架足書史牙籤玉軸當細窺

送仲豫叔黨二承務赴試春闈

炯炯雙黃鵠雍容振羽儀風高辭溟國歲莫及天池文
彩非凡近周旋競陸離明年翺集處九萬是君期

景文寵示四月十七日翰林公過龍山真覺院賞

枇杷五言一章景文已先和復使繼其後

脫畧今山簡能吟舊子春偶因尋勝出不爲採芳人紅
紫千葩盡甘酸萬顆新江雲浮翠壁靄靄散魚鱗

夏夜奉懷景文路分

層櫺霽曉雨餘響猶滴瀝天風吹浮雲入夜已無迹月
波泛脩竹灩灩流几席蘭膏滅眾炬涼氣滿四壁蕙烟
擢銅爐暗觸鼻端息藜牀但危坐萬想本空寂肺肝旣
冷然紈扇亦冰釋將軍不吾期樂事空自得願言賦長

謠爲我記此夕

余初入智果院蘇翰林率賓客相送者十六人各

賦詩一章

泰山屹天下四海同仰止我公命世英突兀等於是胸
中廓秋漢皎絕微雲滓當年事危言軒冕如脫屣正貴
知我希甯慚不吾以風雲果再符六翮排空起一昨厭
承明抗章求迤邐餘杭古雄藩比屋富生齒立談政卽
成興不負山水雍容敦末契訪我頑且鄙大施輝松門
禽猿亦驚喜森森門下士左右粲朱履使君道德姿圭
角非所恃軟語如春風薰然著桃李今朝真勝事千載
足遺美安得筆如椽磨崖爲公紀

龍井辯才老師新亭初成有詩呈府帥翰林俾余

繼和

遠公吾家傑道妙非壺邱德傾龍象侶貌蓋江湖秋平
生經綸學不爲名相留滔滔若懸瀑下注萬丈湫昔年
謝講事眾輓不轉頭剗心老巖穴百念本不浮東南多
望士唯見此老優翰林天下公方外實輩流旌旗虎溪
路竟日泉石游眾生病未已師意可忘憂

送慧悟大師還闕下

道人本邱壑浪爲京華居一住二十年歲月驚須臾禪
餘挾妙術出入卿大夫飛揚動天子聲聞傾九衢紛彼
戶外屢泛如水中鳬高懷勸酬應逸賞思江湖春風卷

衣被千古隨舳艫中冷湧樓觀圓嶠連方壺杖策步鰲頭直上窮崎嶇超然萬象外所得良有餘興盡乘白雲飄飄還帝都

將之金陵寄侍琪服之秀才

黃昏落帆牛渚磯蒼石岸黑行人稀漁燈夜深遠近沒水鳥月明來去飛瓶盂漸與南斗闊身世東去將焉爲鍾山咫尺行可及會當與子同遨嬉

鍾山夜月

萬壑千巖夜未央月華松色共蒼蒼上方已覺無人語金殿誰焚柏子香

寄舒堯文教授